

21/11/1999

10 penulis bertanding

KUALA LUMPUR: Sekurang-kurang 10 penulis, bekas wartawan dan pegawai akhbar bertanding dalam pilihan raya umum kali ini.

Di Perlis, bekas wartawan Berita Harian, Azihani Ali mewakili Barisan Nasional (BN) bertanding menentang calon Pas, Mohamad Faisal Abdul Rahman, di kerusi Dewan Undangan Negeri (DUN) Sena.

Bekas wartawan Utusan Melayu, Rosnah Abdul Majid pula bertanding di DUN Tanjung Dawai, Kedah, ditentang oleh calon Pas, Yusof Omar. Di Petaling Jaya Selatan, bekas wartawan China Press, Chew Mei Fun, bertanding atas tiket BN, menentang Liew Tian Khiew daripada DAP.

Bekas Setiausaha Akhbar Datuk Seri Anwar Ibrahim yang memulakan kerjaya sebagai wartawan Business Times, Khalid Jaafar pula bertanding atas tiket Parti Keadilan Nasional (Keadilan), menentang tokoh veteran Umno, Tun Ghafar Baba di kerusi Parlimen Batu Berendam.

Di Perak, bekas wartawan sebuah akhbar Cina, Lam Wai Mun, yang mewakili DAP menentang Datuk Chang Ko Youn di DUN Jalong. Sasterawan Negara, Datuk Shahnnon Ahmad yang juga ahli seumur hidup Pas, bertanding atas tiket parti itu menentang Menteri di Jabatan Perdana Menteri, Datuk Paduka Dr Abdul Hamid Othman di Parlimen Sik.

Kolumnis Harakah, Subky Abdul Latif pula menentang Perdana Menteri, Datuk Seri Dr Mahathir Mohamad di Parlimen Kubang Pasu, manakala novelis, Azizi Abdullah, yang mewakili Pas menentang Datuk Yong Pau Chak (BN) di DUN Kulim.

Di Selangor, penulis dan bekas pensyarah Jabatan Persuratan Melayu, Universiti Kebangsaan Malaysia (UKM), Dr Shafie Abu Bakar bertanding atas tiket Pas di Kajang, menentang Chong Tow Chong yang mewakili Barisan Nasional.

Di Kelantan, bekas pegawai akhbar Menteri Besar Kelantan, Wan Ismail Jusoh bertanding atas tiket Pas di DUN Melor, menentang calon BN, Datuk Zainal Abidin Abdul Kadir.

Selain mereka, beberapa bekas penulis dan wartawan turut bertanding mempertahankan kerusi mereka Datuk Abdul Rashid Ngah (BN-Seberang Takir), Datuk Ruhanie Ahmad (BN-Parit Sulong) dan Badrul Hisham Abdul Aziz (BN-Hulu Langat).

Bagaimanapun, bekas Ketua Pengarang Bernama, Abdul Rahman Sulaiman tidak disenaraikan semula sebagai calon BN di Parlimen Parit Buntar. Tempatnya diambil oleh bekas Setiausaha Parlimen Kementerian Kebudayaan, Kesenian dan Pelancongan, Datuk Abdul Rahman Suliman, yang pernah mewakili kawasan itu sebelum 1995.

(END)